

氏聞行刑之時間在九時。從容飽食晨餐。始行赴絞臺。其時止有行刑者皮爾卜音一人。二等執法官梅開甫一人。副獄監海爾斯一人。教士赫德森一人。又醫官一人。獄卒一人。其時擠集於獄外者。如好事者及新聞記者之類。共百數十人。中有丁至友哈斯都氏。又印度學生三人。皆不允入內。而候兇耗於門外。於九時四分。皮爾卜音繫索於丁氏之頸中。用力高曳。隨即放擲於八尺三寸之深窟。頸後脊骨立折而絕。自起曳至擲下。不及半分時遂逝。醫官驗明氣絕。教士諷經懺悔。行刑日之下午。陪審員復集決丁氏之罪狀。果當與否。哈斯都君入席旁聽。聞陪審員皆言刑當於罪。哈怒形於色。即有報館訪員叩其意見。哈氏曰。丁氏者。實一嚴正之少年。彼之行動。即表示英政府在印度之所為。必遭反抗也。訪員又問曰。此次死刑之執行。於印度人之感情何如。哈氏曰。我亦不便言以後有如何之應響。惟此次若輕減丁氏之罪。必能使印人之忿氣稍平也。訪員默然。乃又問曰。然則子之意。將以丁氏為以身

殉道者歟。哈氏答曰。此何待言哉。彼之所為。不必問其謬誤與否。即就其舍身為國論之。彼之意。固誠心盡瘁於國。或者決無有所謂謬誤也。印度學生界。皆欲照印度喪儀。將丁氏火葬。揚灰於恆河。英官則執成例。當埋於行刑之地。不肯見允。

按此文為南越報所載。略加刪潤。附刊於此。

### 追記西班牙內亂情形

歐洲最黑暗之大國有二。一為俄羅斯。一為西班牙。其國內教育之腐敗。官吏之昏庸。刑罰之酷刻。皆為二十世紀人類之蠹。前此月餘。西班牙師喪於外。亂起於內。其顛覆幾可立而待。今雖內亂暫息。外兵亦勉強支持。然革命黨人之潛勢。仍遍於國中。未可以一時屠殺之威。稍獲勝利。遂認為革命之燄。真消歇也。

先是。西政府以暴力欺壓摩洛哥。欲以建築鐵路。侵佔摩人之利。齟齬已久。遂在西班牙對岸摩洛哥北境。濱於地中海之梅栗拉地方。迭次開戰。每戰皆失敗。死傷官兵二

三千人。於是國內大忿。京都出征將士之家屬先譁。革命黨運動工黨等和之。高呼於王宮前曰。以戰亡其國。於是北境與法國相近之排賽羅那。革命黨之根本地。猝然起事。時西兵之侵摩者。又遭大敗。死者千。傷者二千。國人愈忿。全國響應。而以排賽羅那省爲中堅。革黨初興。左近軍隊。抗令不願勦捕。革黨歡呼軍隊萬歲。建共和之旗。驅除官吏教士。焚毀教堂。西政府震恐。一面厚撫出征將士之家屬。一面檄調大兵。赴勦亂黨。暫廢憲法。普用軍律。放任官軍施最野蠻之屠殺。自是排省各城邑。巷戰者五日。彼此死傷無數。亂黨以軍火不繼。卒爲官軍占優勝。斬殺如雜草。俘捕者。反接其手。曳行街中。如縛羊豕。軍官任意射殺。共屠萬人。於是革黨之勢。爲之一挫。而摩洛哥之戰事。適亦略有轉機。故得稍寬其手足。用以屠殺自己之人民。然實則此次之亂。雖僥倖暫平。而亂黨之決心。愈益堅厲。故事平數日以後。排省又提議普通罷工。以短付工值爲詞。欲逼燬工廠。又強硬要求軍法裁判所。開釋被囚之人。

裁判所不敢不從。乃駭一一省釋。未幾葛臘西愛及森馬丹兩處之工廠。皆遭放火。救火隊馳往救護。均被工人將穢物亂擲。於是兵警出阻。遂致交戰。兩造共死三人。傷七人。工人被捕者若干人。近來無政府黨又到處演說。散放小冊無算。警察搜禁。幾疲於奔命以死。西政府於此次喪亂之事實。諱莫如深。嚴禁探訪。頃又將無政府黨著名之某某機關報。禁止發行。故知西國國事之內容者。咸謂西政府對於此次亂事。實非常惶恐。西王亦自謂其今日之地位。已不幸而陷於危險也。

## 其二

西班牙內亂。起於加達洛義全省。而首府巴色倫地方。遂爲血痕及火光所瀰漫。然自七月二十六號。至三十一號。爲期僅六日耳。而撼地震天之風潮。卒以鎮定。亂事之興也。如飄風驟雨。而其去也。曾不崇朝。亦可見其政府能力之強固也。有友人自亂中來書。詳述六日之情形如下。西七月二十六號。巴色倫之勞動俱樂部。議決同盟罷工。

以反對西班牙與摩洛哥之戰爲詞。二十七號罷工之風潮更亟。各工廠已無工人到工。午前十時。亂黨已於道路上。設阻攔物。將道路遮斷。巴色倫全城。已不能交通。同時於比耶卜羅色哥村有大血戰。乃亂黨與警察及憲兵衝突也。其地在巴色倫附郭。午刻。駐巴色倫軍隊之統帥。帶二十騎巡行城內。午後一時。亂黨攻入聖馬丹卜荷罔薩爾村之教堂。各教士皆逃走。僅有三人被殺。財物劫掠一空。同時巴色倫城內。亦有血戰。亂黨及警察憲兵。兩方均有死傷。時聞鎗聲不絕。是時亂黨又於格哈西亞區及聖達馬多拉區。添設阻攔物。橫絕道路。在聖波爾之教堂又被焚去。是時兵隊已到。遂往解散聚於杭卜拉大方場之亂黨。城中忽然靜默。但聞鎗聲而已。午後二時。警察及兵隊列爲二行於杭卜拉。有礮隊一大隊。通行其間。向格哈西亞區前進。當警察驅散亂黨之時。亂黨開鎗以拒警察。警察還鎗。約一時許。鎗聲未絕。死傷之數甚多。亂黨不支。始皆逃散。須臾即見車載傷病者。絡繹於道。亂黨於各方

面。多設阻攔物。以斷行人。是日已有五處教堂被焚。亂黨之勞動總會。已爲兵隊占據。亂黨多逃匿居宅。自窗間開鎗以擊。站立於杭卜拉之軍隊。夜間但見火光。皆房屋及教堂之被焚者。晚十時許。計教堂之被焚者。已二十七所矣。途中但見亂黨結隊。攜帶大斧巨鑿。及火把火油罐等。皆以放火於教堂及教士住宅爲事者也。十一時許。復有教堂被焚。警察與亂黨大戰。各開手鎗。然仍不能保護。杭卜拉方場爲最繁盛之區。夜間竟一黑如漆。因無電燈及煤氣燈也。終夜但聞鎗聲。及焚燒爆裂之聲。二十八號爲亂事之第二日。巴色倫全城。氣象愁慘。途間不見行人。牆上皆白色之告示。乃駐紮巴色倫之統將。戒諭居民。不準出門。不準喧嚷。不準在窗間及露臺眺望。並不準歡呼軍隊萬歲等事。午前十時。巴色倫城內不見人影。忽聞排鎗聲。則有一隊兵趨過。乃向教堂前進。因其處又有亂黨縱火也。此時亂黨復與兵隊抗戰。頃復敗退。十一時許。巴色倫駐兵之統將。帶百餘騎巡城。亂黨與此騎

兵衝戰。不久又復逃散。午後一時。亂黨劫掠一售軍械店。掠得獵鎗及手鎗甚多。隨即入一空屋。據而守之。兵隊圍攻。是日午後無大亂事。兵隊於夜間蹂升屋頂。驅逐亂黨。因彼等皆自屋內潛升屋頂。乘兵隊不備。而狙擊之。故兵隊亦不得已而升屋與鬪也。夜間全城無燈光。鎗聲不絕。亂黨屢次攻耶穌沙里亞教堂。皆為其中之學生擊退。二十九號。是日為亂事之第三日矣。巴色倫已無鮮肉。各種食物亦幾告絕。午前九時。城西又有血戰。礮隊往助步兵。途間阻攔物極多。蓋亂黨已預計及先為布置也。是日聖馬丹卜荷罔沙爾村之亂黨。全棄械歸降於軍隊矣。三十號。是日為亂事之第四日。巴色倫之居民。已三日不出。至是略購食物。以為是日可望平靜矣。乃午後一時。又聞鎗聲。居民逃匿。兵隊與亂黨互相鎗擊。因亂黨又欲縱火於教堂。其處適與大學相近也。各處電桿及德律風桿皆倒。有一大隊亂黨被捕。押送入獄。至是日已有三十二所教堂被焚。當亂黨占教堂時。有一老人年八十餘。亂黨

釋之。未嘗加害。此外各教堂之學生及女教士。亦未加害。於縱火前皆善遣之。惟教士則殺死甚多耳。三十一號。是日為亂事最後之一日。風潮已略平定。午前十一時。尚有亂黨欲縱火於荷舍德佛羅爾街之教堂。為憲兵擊退。死六人。傷者甚多。捕得七人。亂黨氣餒。至是日。城中店舖已有開門者。惟電車及街車。尚未通行。夜間已不聞喧擾及鎗聲。亦不見火光矣。是役死傷之數。頗難調查。有數電謂兵隊僅死三人。傷二十七人。亂黨死七十五人。傷一百二十六人。此皆據送入慈惠大病院者計之。有就特別醫院及逃匿在家調治者。皆不在此數。其他各電。又謂亂黨死九十人。傷二百人。總之不得有確數之調查耳。在蒙舒時之礮臺。閉禁亂黨約四百餘人。暫以代監獄也。巴色倫之居民。現已平靜。惟要求政府釋放被捕之亂黨。巴色倫之市會。亦已集會。均不直亂黨所為。正未審軍法會議如何裁判也。

巴色倫之現狀。極爲衰敗。路燈皆被焚毀。道上鋪石皆被挖去。樹木皆被斬伐。店鋪皆被破壞。有許多之富麗藏書樓。亦均付之一炬。亂黨復焚去一電氣廠。凡有軍械之店。掠奪殆盡。當亂黨火油焚盡之時。又各處索錢出購火油。若專以縱火爲惟一之手段也者。現時到巴色倫之兵。有一萬二千。秩序已漸恢復。電車街車。均已照常通行。內部大臣取締報館新聞。已不如前數日之嚴厲。惟尙禁法國報紙入境。因其記摩洛哥事消息太惡。恐以搖亂人心也。加達洛義省。在西班牙夙稱不靖。數十年來。常行軍政。無日不戒嚴也。其間政府亦屢次取消戒嚴令。然當其取消後。必有擾亂。或炸彈暗殺等事。隨即重申軍政。本年三月。西班牙王亞爾封史第十三。遊歷加達洛義之首府巴色倫。居民歡迎。亦無意外之變。歸京之後。遂即取消軍政。然自三月至今。加達洛義並無亂事發生。論者方以爲異。未幾有西班牙與摩洛哥之戰。亂黨遂利用此機會。煽動逃役之兵。倏爾大舉。蓋是地亂黨根據深固。其鎗彈皆所預

儲。固無日不有戰心也。

西班牙平時。因爲財政起見。常於未滿役之兵。即聽其退伍。以節經費。今因摩事。政府亟召此未滿役之兵入伍。而此退伍者。多數皆自謀生計。或且已有妻孥。因而大爲恐慌。紛紛逃役。亂黨游說。與其死於摩洛哥。毋甯革命而死於祖國之爲愈。此亂事所以傳播之速且巨也。有謂西班牙政府。專挑選籍隸加達洛義之人。赴摩洛哥前敵。因此激變。有謂加達洛義之人。有不願赴摩洛哥者。政府輒以軍令統殺多人。因此激變。是則西班牙政府之罪也。現聞西班牙於摩洛哥之戰事。極不利。二十七號。摩人與西兵大戰。西兵大敗。死傷至數千人。大將班脫斯。大佐奈瓦司。及亞哈比乃司。皆陣亡。西人在摩居留之美利刺城。已被摩人圍困。摩人毀去鐵道約二百邁當之長。統帥馬海刺。方告急於政府。請加派七萬五千兵。並大砲六十八尊。爲再戰之計。則其情形之危迫可知也。

按西人在摩居留地曰美利刺。去美利刺約二十基羅

邁當。有一鐵礦及鉛礦。爲法西公司。及西班牙公司所開採。此礦蓋拉牙部落首領勒荷基。售與西人者。去年十月。蓋拉牙部民大怒。因此而逐去勒荷基。同時亦逐去西班牙公司。然此礦於西之政治及財政上。均有關係。政府以兵保護公司。乃再從事開採。摩人恨之特甚。無可如何也。七月九號。公司有數工人。離美利刺六七里。爲摩人所襲擊。因是而釀成西摩之戰。此戰殆西班牙與蓋拉牙各部落相戰。非與摩王慕連亞飛相戰。亦非與革命黨首領勒荷基相戰也。現時摩洛哥共分三大枝。一爲慕連亞飛。摩之共王也。一爲勒荷基。摩之革命黨首領也。一爲慕連之弟。又其他之革命黨首領也。三人皆有逐鹿之爭。相持未決。蓋拉牙等部落。在三者之外。不相統屬。居民約二萬餘人。即現時與西班牙決戰者是也。

### 日本人調查中國之事實

同文書院卒業之日本人。共得四百七十名。內僅二十名

歸國。外此之四百五十名。皆裝髮辮。易華服。潛至中國內地。窺探一切。而各省之主要都市。至少必有二三日人。作隨時之偵察焉。

其實地研究之開始。僅從上海至北京一帶之地。略爲調查。迨距今三年前。實地視察之舉。始普遍於十八行省。其法以同期之卒業生。五六人爲一班。分成十數班。授以各種之研究問題。向指定之地點旅行。其一班共同研究之報告書。約在二千頁左右。綜計每年。可得二萬幾千頁之報告。至其研究之範圍。則於稽查其地之氣候風土物產人情等事外。更採集多數之動植物標本以歸。而在此調查期內。學生之努力。實堪驚異。其所攜者。僅鍋盃諸食器。及輕便之食品等。若途中有罹病之人。則一班之中。先行者半。停留看護者半。迨病者痊後。復追及之。當其深入內地時。備嘗探險家所歷之辛苦。如急流之徒涉。毒蛇之來襲。種種危難。不可枚舉。而前期之卒業生中。赴浙江省之一班。忽因食糧缺乏。僅啖絲瓜以充飢者。一旬有餘。而廣